

四庫全書

集部

欽定四庫全書

集部
鶴林集卷三十一

詳校官庶吉士臣瑚圖禮

主事_臣呂雲林覆勘

謄錄監生_臣徐元秀

欽定四庫全書

鶴林集卷三十一

宋 吳泳 撰

書

答吳毅夫書

某自祖王人之車于紅船翠蓼邊曾一再書矣都為人
作活計不能輸此衷曲耿耿懷思但隨落月照鍾山也
世謂以儒名科者不應煩之生計噫誤矣大學曰生財
有大道生之者衆食之者寡為之者疾用之者舒則財

恒足矣是善理財者莫如曾子孟子曰無政事則財用
不足是善豐財者莫如孟子蓋自吾孔氏以來未有不
以此發身者而況狀元及第必歷三司使國朝自有典
彝在大卿孤騫翰墨之林拔脚風塵之外心事瑩瑩
直與文墨偏長以議論為功業者迥不相同此某所以
始而疑終而信終而敬且服也微之去國言事者絕少
館中惟黃成父頗相好它時風力擔當不在諸賢之下
本仲亦早晚赴闕矣屋矮暑蒸如甌噉日良晤煮茗談

暮歌文公之詞使人和之

又

某比答槩誨忽遽甚矣就使不忽遽亦不能盡所懷也
鳳山之下林深樹密花落鳥啼溪洞活泉飈飈從松間
流時有一二道士能鼓虞舜南風之絃彈伯牙高山流
水之操其幽幽可以適體其黝黝可以觀妙若有買田
築屋之資便可從老農圃種田藝瓜作終焉之計而茲
事卒未能也穀夫竟肯來說半日話否每得小兒書聞

以某去為身憂固荷朋友之誼但恐行止有命弗能強
人之從袁尊固訪山間說陳計議者就湖州賣已新屋
置丁氏之屋豈方伯耶若爾則就往僦居何如或得富
彥國司馬君實諸公垂念堯夫直以園契宅契戶莊契
相示則尤為之望也付之一笑道夫過金陵省季永之
病於鳳臺勞問極至凡今之人莫如兄弟言哉詩人之
言兒子亦不欲令久留都城或欲拜見句謂之進

又

某頃承回槩極感相於之意山間久居動輒成趣林水
靜深絕無暑氣與琴宜松月高朗清風徐來與鶴宜雲
亭雨觀戶悄人疎與棊宜河柳不種自生水花不植自
富與詩宜却緣兒輩時有書來未免薄惱懷抱鄒樞胡
為勇去直翁胡為請告欲歸稽山胡為召寶慶間借君
臣大義以鞭辟善類者胡為復見之論奏火胡為屢作
不止兵胡為諄語未寧貴要之家胡為搬動行李以為
民望此何景也須是別作規模喚幾箇人歸來降心商

量方可龜山故事便可推廣此事望毅夫力贊廟謨之
決某輩只因多言掇禍今又不能自禁輒與宗文及之
句勿廣

又

某比者使人之還嘗飭一箋以答謙施計必上徹穹覽
宣歙間大雪決旬深者丈餘淺者盈尺川陸為之路斷
米不入市薪芻價益高師人多寒細民艱食為之邦侯
者只得痛自剋責發倉廩粟支歲寒錢米以千計錢以

萬計甫得濟活幸至無事隨分燈夕又與之作好春矣
詩牌云半空霽月天公眼一點華燈太守心此其志也
設廳下又有四句鵲岸雪消金拆靜鰲峰春到綵燈繁
時人不解邦侯意將謂癡狀作狀元此其興也燕同官
及尚中兩詞就錄請教幸賜標月之指道夫近相聞和
賀新郎水調歌筆力稍壯舍弟自去秋過此痼疾乍作乍
輟比因風雪冷氣衝搏疾逾甚人豈知果真病耶毅夫
近按吏鄉人之好事者又謂曾經商量寬哉某已四上

祠稟期於必去草此占叙悃悃願言順理三陽珍馭
以輅新渥

又

某一年不孚音思心彌結以某懷殺夫想殺夫亦拳拳
於某也客有自雙溪來者竊知尊兄觀書靜閑屏動晏
晏守道不以榮辱欣戚嬰懷狂士豪徒亦少接納此自可
清心省事想學問如大川之增如長日之益而莫能禦
也某閒居寡儔以一日之力分為十八分讀聖賢書一

二分應酬朋友所干文字率以為常儘有樂處第西州
士大夫以官為家罷則無所於歸瞻烏爰止于誰之屋
斯世又未有如韓魏公為石守道買田莊司馬溫公為邵
堯夫出屋契者只得力學守貧柴立於其中而任運也
久欲相聞以病瘖瘡數月入冬方有起色拜此草草願
言冲輔氣機以斯文斯道自愛

又

某間者不遺枉賜書教辭豐誼渥愛踰骨肉以某之懷

穀夫知穀之亦拳拳於某也進退出處大畧相同更不欲深為穀夫道似聞論語衍究久已板行頃蒙教序引極為平正友朋有自四方來者畧舉數條却未詳其義想深居窮理必有精到曷不綴一編以開警未悟耶某考訂書傳六年于茲矣前乎望刊定之聖人而不可見後乎顧習傳之學者而未有得兀兀於殘蒲朽竹間而欲窺姚姒殷周周公仲尼之蘊亦已難矣蓋書最難省又難全解缺文當考分章斷句當考今文與古文當考

小序與大序當考帝王之辭與史氏之辭當考注疏有
直見理者有極害義者諸家解有造平易者有傷太巧
者當考其如天文地理歲月日時又不可不細考也林
少穎解只到洛誥而終呂伯恭只自洛誥而始朱文公
解只有虞書三篇周書三篇今人解書盈箱滿笥此某
之所深懼也所以歷年滋久而藁未脫用心益勞而功
弗就安得一簡而釋此千古之疑哉歲月易來佳朋難
得石酒伴書相聞姑見遠意餘祈以斯文珍矣

答李微之書

某間不上起居狀比從令弟在史轉示寶帖熟窺仁誼
之言度越畦畛之外近見尤伯晦說鷗馭久留池陽方
此西遡蘆花荻竹之浦不致落寞否蒲葑漲肥却可到
江陵度夏也紉金匱石室之藏游紅蓮綠水之幕歸興
亦不惡矣朝廷見行下館中令盡以寧考會要三百卷
發付以待鴻筆纂修次第悉如大著之請也某六年朝
列半歲五遷已為僥倖而正兼詞掖則尤僥倖之至也

平時于文字間不敢不勉而又有封駁之職比繳還許
俊承宣使節度使檢校少保駁論梁李降官之罰太輕
公論頗以為然不審繳章亦經書月否和仲之出毅夫
之罷左史計必報去詹叔將漕金陵為況極相安舍弟
在荊州必得胥會幸趣渠早來兄亦欲援更迭之制持
一麾而去也欲言如海掛一漏萬願言輔養神明之舍
拓開久大之業

又

某咫尺門牆少踈拜狀蓋秋來一病彌三月不愈近方有起色屬服剛劑太過胃廩之官雖健而魄門之癖間作岐黃素問書陶蘓本草注今猶未離几席也侍郎抱國史隱於南山之下揆諸公論負屈稱久矣作宋一經舍鴻筆誰屬且晚須奉京祠以終其志耳某屏居一年讀書亦粗有緒嘗以為文定胡公策進士四十年在官實歷不登六載文公朱先生歷仕四朝幾五十年立朝止四十日仕於外者僅九考所以得此歲月之暇能讀聖

賢諸書光明正大卓然立於天地之間名之曰人某六
十二翁矣瞬息光陰更不堪把玩若復悠悠憤憤不倍
用其功則將起初平無及之嘆而墮於小人之歸矣甚
可懼也膜外榮辱又何足嬰諸懷哉本欲相與盪簪歎
論名理來往極鄭重薄禮姑餞歲華餘冀精護鼎飪力
扶泰道

答李成之書

某去冬中川上狀今復星歲改矣前此聞尚書去國復

還寓里意謂撐舟渡月過苕溪來可以得一番會晤物
色久之而欸音竟不聞矣尚書雅淡冲夷靜觀羣動讀
書精舍老兄弟日各相講磨想必有進學之益孟子所
謂兄弟無故一樂也某自罷守來歸則無此樂矣嘗取
典謨訓誥誓命之書讀之亦欲向上作少工夫蓋此書
竟難全解只如屋壁所傳與口授不同諸序所記與經
文相舛帝王之制與史官之詞舛雜難辯篇帙之離合
章指之同異歲月之後先地里之遠近又或有缺文有

疑義有斷句傳注有理到者有全害義者林少穎洛誥而下已非親作呂伯恭洛誥而上亦多出其門人所記此都著整頓拈掇出來浩浩難下手不知年歲之不足也向來隆山先生令兄郎中與尚書俱為此學苟有精至處無惜下教甚欲一見審問明辯而天寒歲晚矣薄禮聊見鄉風餘幾珍護氣機佇登密地

答岳肅之書

某伏以祥雲齋雪媚此章月恭惟坐都賦輿春滿淮甸

泰元媼神槩相台候萬福某生長東蜀不識東津面每
得片紙妙墨洗刮千秋之塵數行麗詞抉出萬寶之藏
則因其書可以得其人得其人可以見其心矣俗流化
敝人物衰少政厖土裂太音不完工於翰墨者必不閑
於政事精於綜理者必不贍於文學以儒飾吏事者又
必不能測識軍戎萬里之情侍郎精神而醇文墨而吏
習中有數千百年南北巧攻守樣子而沈潛韜晦其與
書生僅習偏長縮縮如束長竿者大有逕庭矣但諸葛

孔明當經事綜物之時而文采不艷過於丁寧陸敬輿
於遠近調發之日而書詔若不經意動中事會更望侍
郎以孔明敬輿事業自任則文藻餘事益浩乎其沛然
矣某猥以晚學丞于秘林學殖就荒筆花不潤朝紳間
每說侍郎有數種書皆人所未見久欲拭目一觀而未
有便偶因臨安洪兄之行輒就委之洞扣青囊之鑰惠
肯賜教它時有得焉則不敢忘所自也洪兄名勲字世
魯閬爽而秀舊識其父子於岷峨之下乃翁自拜書家

食之久甚可念也曉窗乍晴拂寒雲掃殘霰崖畧布此
上幾護太白之璫宿硫黃之鼎竚聽履聲切星辰而上
某忱扣

答蔡遵父書

某比從三衢士友得知靖作狀開藩之始訓齊吏偷撫
問民隱純以豈弟為政某每笑俗儒誤講豈弟二字大
而為州小而為縣一向寬弛紀綱不立教化不行遂使
貪官健吏目吾人為書生不了官事冤哉吾道之不明

耶豈以強教弟以悅安本經正文元不教爾寬慢放倒而後為豈弟也遵父其得之矣良貴去國之後遵父得郡而出景仁和仲屢丐外而未允某後日再請恐徑可得歸也向來三數朋友鳴一時之盛絃絕響息未有繼者荃蕙化而為茅兮蘭芷變而不芳風俗移人不可不强自樹立如來書所謂立朝大節當使凜凜可觀由衷之言一本諸道而時不與焉盖同此語脉也仙里葉六十四丈竟是學問有本數日前出示近帖亦復論至此為

之慨嘆某灾患連連書問停廢已久但世俗之禮一不相酌答便以為背教傷義惟是五項起頭之劄施於故舊殆似浮道陽相尊者仍用歸納切乞原照浦城令兄一書至今方能報去亦不暇治擇筆墨甚草草耳

答方齊英書

即日夏氣清淑伏惟袖昭文氏之琴玩心聖處相在爾室台候啓處佳福某交四方之士久矣荆江風雪中小車從花外來遂得交幕府之彥暨游中都又復盍簪餐

秋英之初落啓夕秀於未振真退之所謂吾行天下得此於人蓋少也道喪言湮才識不競闇識者既難窺藩皎厲者又不由戶粗有一知半解者則悠悠夢覺之闕而無大警省知縣於天命流行之間而洞見著存之理其何敢不以古人期之但聖學路長卒難湊泊為善之事切須平居講貫令本數末度密無罅縫則它日臨事必不至錯了路岐舜之所以孜孜顏之所以拳拳正為此也若必待居官接物而後相與商訂為善之事則將

恐善利雜糅而決擇難工夫不接而德性懈自縣而州
自州而一道又將欲大有為也則何以哉義理無窮問
辨無數區區之意非為它日之為善更不必商訂也蓋
只欲就此時完養思慮栽培意脉先使邪氣妄念無一
毫夾雜於其中則舉而措之天下其為善之功用豈不
滂沛也哉某久玷周行曾微補報嘗愛橫浦南軒二語
書之坐右蓋以為觀大節必於細事觀立朝必於平日
平日趨利避害它日必欺君賣國平日不能犯顏敗諫

它日安能仗節死義以此體段常存於心庶幾不至為
小人之歸所以輪對二篇應詔一書亦隨分說得去不
謂副草已洞徹書月也既切矣又磋之既琢矣又磨之
正有望朋友之規勿愛於言幸甚自餘仍乞以聖賢事
業珍誌

答王成父書

某伏自去歲從合陽答來教之後遂下古渝日酣於欵
乃聲中雖欲摘蘭荇以遺所思亦無從也夏中伏領寶

帖襟儀灑落見乎其辭鄉邑得茂宰悉意字眊絕以豈
弟為務二年民安之但豈弟二字世之士只一滾作慈
善看了豈以強教之弟以說安之不但安民便了必也
扶道植教俾斯民興於禮遜然後盡吾所以父母斯民
之責不然則徒善而已矣成父當亦領解於斯也某綴
跡周行已十月矣輪對尚在來春之莫宿齋預戒充積
誠意久矣朋友責望不敢不勉是間文公先生諸弟子
如葉文知道郭文德元吳文西庵度文性善時有過從

講磨之益方京華車馬如霧而每與三數公作冷淡生
活澹則欲心平和則躁心釋以此存主得定沽名好官
職之事都不能犯吾之關也成父以為何如仍冀講學
自厚

答蔡遠父書

某頃被融風為惱繼遭臺評災患遘連曾不寧止聞報
之後即徑往鳳山待罪聖恩闕大不加黜汰初二日晚
既降予郡指揮二十一日又被寶章寧國之命罪戾之

人不宜冒昧居此已連䟽控辭必祈於得請也山間閒
寂絕無暑氣每風輕雲澹花落鳥啼滴露點周易焚香
讀道經頗有佳趣又一二道士能鼓有虞氏南風之琴
歌離騷大小山之操其幽幽可以處體其窅窅可以觀
妙若有買山之資則便可築數椽於其側與山農溪叟
種田藝瓜為終焉之計而茲事卒未能也京城再火國
力既屈邊聲一動兵力又單諸賢何以為策是間極僻
黠陟俱罔聞知或朋友訪來粗能言其梗槩獨吾達父

素非生客一字不相及何耶海內人物絕少今鄉月既
高公論赤幟往往亦責在閣下切冀發揚蹈厲無日飲
西湖水作不鳴之鴈乃所深望紙荒筆槁占報不莊上
幾以天下之寶為天下珍寔

答郭子寄書

某端平更化初獲接服容觀玉聲於振鷺庭下違去道
德條又五年有斐君子終不可諼兮未嘗不真此詩於
懷也某山野之人少知世事六月間得邸吏報狀見御

筆新除兩諫官除書一頒識與不識莫不為朝廷慶得
賢之喜京師競抄諫疏以流傳下邑遂得與舍弟拜觀
言論侃侃風采諤諤人心道心之論陽明陰濁之說聖
遠言湮道衰化敝幸得正言復體貼出來至於覆鴛巢
以來鳳凰耬蕭艾以植芳草此則又言人之所難言幾
有動搖山嶽之力蓋學自伊洛中出者其淵源議論固
自不同也然嘗讀國史士之學古懷道者不為宰相必
為諫官而移孝以教忠者至謂欲做諫官不能得蓋式

訛爾心以畜萬邦其所關係甚大只緣大人格非之學
不傳惟有諍臣一路可以行志比又聞一再抗疏請祠
何為太蚤計耶慶歷中孫之翰等因劾宰執不下相繼
引去仁宗從容謂甫曰卿等言一不聽則求去令朕逐
言官各自為計則善矣如國事何元符間鄒道卿以諫
官闖得罪自謂其言為戇田承君正色語之曰願君無
以此舉自滿士所當為者未止此也方今坎離失位泰
否反卦其所當言者甚多勸行好事以延續元命力扶

善類以培養壽脉小言入則受小利大言入則受大利
正言豈宜一日輕去朝廷之上哉某一擯歲餘自知學
力不充無以孚信上下只欲潛心伏奧窮理脩身為究
竟法忽今月五日誤叨進職予都之命恩出望外拊心
若惕豈非端人在位有以陰扶密護不使之終棄耶不
作帝城書久矣念不可無一字伸賀謝之悃書不盡言
所冀護好賢之衣寶擊邪之笏以昌公道以康兆民

又

某比者春中飭箋用敬計已關徹書月茲覩除書承知
陡下言坡晉躋柱史拾遺失一諫士雖無龍墀扣額之
風記注得一儒臣猶有螭陛直前之路未須引去儘可
攄忠右使英名矯節已在水黃河之源山泰華之頂矣
蒙泉而出之以時宿火而達之以壯猶不能不望留功
名作久遠者也某自來東嘉適值歉歲悉力招徠除某
與同官捐俸廩勸分外其朝廷科降度牒倉司分撥米
錢一文粒皆實惠及民今排日糴濟度可至六月終今

則楚麥豐登雨暘時序秧青水白當有一稔之望生平
精力盡耗於此重以鵠原之戚外景與內心相觸百念
灰寒恐廢郡事更望於吾君吾相之前力賜一言令某
早得脫去不勝至感餘祈珍芻蕘鼎飭芙蓉裳以紓兩
地之拜

答徐茂翁書

某曩在宣城曾得一番交訊罷歸寓里翳然林泉間一
字不敗通帝城書雖厚祿故人音問亦廢夏六月忽聞

御筆除兩諫官亟起而視黃紙除書則元直抹宗也公道宏開端人進用不但為吾黨賀為天下實賀後一月朋友間傳示三疏斂容讀之司諫平時清謹恂恂似寡於辭今遇事當言風節堅勁議論切直無所避直得諫臣之體王沂公嘗謂韓魏公曰向來臺諫官如高若訥輩多是擇利如范希文輩亦未免近名近日頻見公章疏只如此可笑如此可笑云者某猶以為未能窺司諫之所止也官以諫名立殿陛與天子爭是非辨邪正乃

其職分昔之小人嘗以朋黨二字傾忠良今之君子多以心事二字被誣謗國朝名臣如程天球歐陽永叔蘇子瞻周子充皆不免受此名況它人哉不是諫垣獻納經幄從容於上左右深明而力辨之則將恐仁賢見忌於蓄疑骨鯁潛消於積毀雖有正國致君之心亦何自而達耶殿講司諫計必垂念於此否某自奉祠官深居退省誦衣錦之章絕不以文字語言求聞達於世比恭甫登用公甫引去首聞司諫以詞翰稱譽於諸公間良

荷不遺故舊之意雖學植槁落不足以仰副盛心而起
家予郡越等進職意者亦由拂拭游揚而致斯哉某丞
外府時昉識司諫在郡從之先今既得路亦不能不藉
一雲之終覆也草此申賀併述謝悃所祈護太白璫毓
疏黃鼎以棟吾道

答趙茂實書

某春夏間常得文訊居閒成癖一向不復嗣音中秋五
日夜讀黃紙除書承聞疏恩鳳闕寓直鰲扉斯文有光

吾黨增重猶記往日茂實與某評品文章載南塘語謂
自六經左氏國語外至西漢而止又說某料子不曾夾
雜晉唐而下草料是時已嘆服英猷卓識迥與綴文之
士不同一舉而為南宮舍人再遷而為翰林直學士固
其宜也大抵文章只要古履常法度宗王介甫景元辭
氣似歐陽永叔蓋自西崑剝落後歐王兩家實為近于
古茂實於此稍加意焉前修不難到也某閒居寢久兀
兀一經今已窮年粗有一知片解更不復為言語詞章

比又叨誤恩除閣子郡見具免牘萬一未賜允俞只得
先過東陽望玉堂如在天上所冀殮沉瀝毓清明厚自
珍茲以聽金蓮歸院之詔

答唐伯玉書

某暮春送客於清湖翠柳邊今又見荻花風矣每懷濬
發英猷誇修偉節候鴈北飛所以望吾子正也時事豈
無可言向日諸公但言君子小人消息之幾今此便可
破口說君子小人消長之決此亦是箇說話只在翻轉

使耳欲言如海掛一漏萬會景仁詹叔諸文引誠餘祈
為道體珍重

又

某比者外甥入京待試輒附一箋申述起居之間計已
闕徹省檻得邸吏報承知襍被直郎官省提衡當吏部銓
冰條甚清華輒益峻每聞持左銓當以嚴典右銓當以寬
嚴以窒貴要請托之門寬以開羈窮阨塞之路於斯二
者而用法酌情則得其平矣子正以為何如蜀中聞又

有遽報劍閣開達之寇頭勢頗重益梓夔峽間恐又如
沸鼎矣每思東坡手帖云歲猪鳴矣火爐上燒骨頭煮
血青自有一種泰安風味今那復有向來時節感時之
淚不覺迸流重之以兄弟顛連親戚離散積憂成疾幾
旬日不解隨分又有官事如誅斬逃軍放釋罪囚減價
糶米增錢充會皆不能不費酬應茲豈養病之地哉屢
上丐閒之請誠出衷曲若就早得去不致委於司敗幸
矣扶憊相聞願言清明厥躬竚有親擢

又

某去秋因憚推官人便草草拜狀併以答汪尚中復卦
動靜說求教回書示及剛反之誼更圓亦書之一助也
子正經明行飭學易書年工夫自有詣處今不遠數百
里錄示婺源記文且云尚未分付指誨修改地中有山
謙子正實見於行也性情義理之學人皆謂二程子發
之而不知自胡安定石守道孫明復以來已有其漸古
文之學人皆謂歐陽子倡之而不知柳仲塗穆伯長諸

人已近於古文以理為主體次之學而無統則悖言而無法則支而古今文人學士見諸紀載者不知其幾而文公獨取古靈先生天台孔子廟記曾南豐宜黃及筠州二學記蓋華藻之辨易工而義理之文難好也至若文正公子陵祠堂記胡文定父子極所稱道而文公獨疑先生之心出乎日月之上光武之量包乎天地之外未免傷粗而不密樂城晚年作待月軒記自以為見理最高而文公獨謂其軒是人身月是人性未免假外而

合內東坡文字任氣有疵病處最多安南學記說古人於射時因觀者羣聚遂行選士之法却似因人之聚場命之以作角觝戲無甚義理蘇范尚爾豈可以易心臨文哉矧如朱先生祠堂文許大題目使某輩當此筆也須是浸灌義理根極體要將文公所說古靈先生曾南豐體段寘之胸中又須觀文正公東坡樂城疵病生在甚處養其膏而俟其光耘其耨而望其實雖然如此猶不敢輕下筆本之以黃離尚之以白賁體之以含章之

坤順之以養正之蒙博之以畜德之大畜韜之以用晦
之明夷原頭上浹洽則流之所出自霽霽莫能禦矣此
皆先民教人之標準某輩常遵守而勿失不知高明謂
何台諭諄諄仍以朱先生所論記體答來教幸賜勿罪
自餘切乞為斯道斯文梁棟自任

又

某去歲東嘉交訊之後邈不嗣音中間承聞祇召入京
陞華粉省都弗克申述賀語然與四方朋友未嘗不同

致君子得與之喜也子正行高而養粹德新而理明玩心
黃中觀象曰賁眎世間華競恬不以嬰懷再潛于郎不
審曾登對否積誠意以格君心主公論以扶國脉度必
有可觀者然某嘗謂與其過于巷而旡咎則曷若揚于
庭而有厲為光明也前時陳叔茂曾拈出明夷左股一
段援引頗切而發明未瑩後來頗以某之言為然不自
揣量動輒攬行奪席良可笑因筆及之某治郡無狀一
年之間喫盡辛苦賑飢恤荒髮為之盡曰其如蠲夏稅

放秋苗置裕民餉軍兩庫粗有益於東嘉而終以罪去
平生所遭類如此更何敢尤人耶姪輩為亡弟請于朝
葬荆溪且欲廬墓二年然後議所居止某勢不容不暫
回德清也偶因問及道其梗槩良晤尚遠更乞冲養道
腴竚登經幄

欽定四庫全書

鶴林集卷三十二

宋 吳泳 撰

書

答羅嗣賢書

某去秋八月訪尋碧梧翠竹之游文闈已鎖醉翁矣霜月之夜細敲棋子空落燈花懷我良朋莫適其願迨理行艫東去又弗克干一語為標月指悵然而已府教學宏而詣文麗以則每見之詞翰間清腴奇峭殆欲謝朝

華之已披啓夕秀之未振眎某輩學植之搞筆路之荒
大有逕庭然探黃離畜牝之旨味中庸尚絅之訓昔之
聖賢所以修身立命體受歸全自有可尊可貴者在而
直不以文字語言為事業就文字中言之則又當如清
水出芙蓉天然去雕飾而後為至也向來兄弟亦好為
文詞粗識減字換字法今年漸長看來都靠不得日夕
戒謹恐懼實懼為宵人之歸故每讀一書必擇緊要用
功處潛玩體索令帖著身上來蓋以我觀書則隨悟而

有益以書博我則釋卷而茫然此理甚昭昭灼灼修之
家庭用之天子之廷不過將此體段充廣去嗣賢所謂
幼學壯行之誨大約其謂此耶浙西春水浙東夏旱梓
遂與西州山鄉一帶多有流民淮風益肆橫天時人事
如此憂端無窮大游與五福太乙之說更須詳推測下
成都教授元有一任回除學官指揮試檢尋見示恐或可
饒舌也自它更冀為天下之寶珍爰為請

答文子舟書

某夏中伏拜手帖方謀奉報而剽聞敵騎已犯武休矣
寇之始至也賓師有去之道自與他人不同獨是音響
昧昧畧不聞撰屢消息心竊憂焉後來得兄弟朋友書
則知還定後已即回漢中但不審學舍亦遭焚燬否耶
崎嶇戎馬之間講明俎豆之事此一難也當世所急者
長鎗大劔所問者芻藁糗糧而子舟衣縫掖之衣領青
衿之士絃歌是間此二難也諸道惟東軍易潰潰則叛
叛則招招則驕利為寇而不利禦寇子舟雖欲受出征

之謀歌獻馘之頌書破賊之露布何可得耶此又三難也積是三難都無一可誰不謂子為迂然尚有說副使舉動磊落傑特子舟倘抱經濟之習直扣軍門以半策干之度必引為上客此則鄉人所屬望也朝家每憂西頭事重且晚必遣動一番却當延譽陸續稟聞爾某仕材荅颯秋初忽叨祕館之命後兩月都城火應詔上封事未免又貢愚言較之輪對覺得更踈直也世間事不言則已言則升湛進退直颺下一邊安能如騃人癡子

不明不了長居戶限上耶良晤尚賒願言實此令名以時自力

答程叔運書

前年敵騎入洋川曾草草一箋訪問生死道塞地梗浮沈不能懸斷去春有賈人攜鉅緘而來已驚喜過望今歲又拜瑤墨迺知自洋而漢自漢而復之巴山其為兵間困苦之狀盖有史冊中之所無者疾疚所以生慧憂戚所以玉汝安知患難流落不以老吾叔運之氣耶叔

運疑安山立論事泉湧運筆颯颯動書數千言亦自奇
峭博麗使當漢之初興必不曰安得猛士生唐之中世
必不曰安得好漢麤細並入皇王帝伯錯出豈不為經
世之才但韜晦善藏或者猶有餘望來書又欲驅駕筆墨
檄召風霆拈弄刀尺剪裁宇宙此固書生活計但恐風
霆高遠宇宙宏闊君未必有常山寶藏符并州快剪刀
耳一笑所需憲漕書定甫舊朋友景南亦常同官不敢
不如戒作去然聲名氣焰如此恐未足為輕重也某登

朝六年分毫無補八月更得一對則便可歸掃松菊矣
郡兵鵠立索字草草占答自今應有遽報密聞却望時
因北風惠我好音

答黃子實書

某去歲得舍姪江陵書頗詳入峽之耗猿啼瘴雲鴈落
別浦竟不能馳寄一字然每與兵侍郵筒往來則未嘗
不聞知也制侍以真法從開大行臺幙中雄辯呵斥星
辰馬上撒書鞭走雷雨此內機之任而以詩從軍又其

次也今讀壬辰已後詩藁冰懸雪跨混之唐人集中固
無能辨然歐公每謂聖俞之詩氣完力渾辭非一體至
於它文章皆可喜非如唐諸子專號詩人者此則某猶
有望於子實也某三年祕府僅能收拾放心留意簡冊
其間良朋益友相規警多不喜拈弄筆墨以故詩人之
類絕少今得君書來譬如早年好獵自後戒之甚嚴及
至中年忽見人飛鷹走狗猶有喜躍惜乎未有見成之
詩以答來教耳

答胡叔獻書

某頃被火之後復遭臺評灾患遭連居無寧止聞命之
夕即襆被守關而出更不候星牢落雞喔咿矣今暫憩
翔鳳山下不謂故舊時相勞存獨惟太社定交不為不
深畧無一語之贈方此驚怪而蒼頭已踵門矣來書以
道之興廢歸之命身之遇否歸之天陳義甚高晚學何
敢當此但山間林深樹密花落鳥啼溪洞流泉飛遶屋
下三竺靈鷲山風斯在下又有一二道士能鼓虞舜南

風之琴歌伯牙流水高山之操其幽幽可以處體其窅
窅可以觀妙荒志滯慮為之頓釋若有買山築屋之資
則便可於此種田藝瓜為終焉之計而茲事卒未定也
記得邵堯夫在閒司馬君實富彥國諸人皆與之區置
家事如宅契園契戶莊契悉捐而與之今人與居而古
人與稽安得有若人哉予郡指揮雖蒙札下罪戾之餘
安保其往比得小姪訊舍弟又病于金陵甚重風雨之
思南仲子華襟誼高大撫問備至令人不可忘因書到

維揚為某拜意令舅蓋自入山之後更不欲作厚祿故人書也自此遠矣草草占答餘惟以天下之寶為天下珍矣

答張平父書

某去秋理行艫東去曾於蓬窻傲兀間草草書數行以酬贈言纔出涪江望西山紫翠便覺日遠雖欲採杜若摘蘭苔以遺所思亦無從也平父志強而文贍才老而意新靴笏之林纔試初武徑登上幙連取薦書如斧破

竹如丸投區青雲可立致矣然朋友之望於平父者則
更宜味含章之旨守居易之訓緩轡長塗毋墮蹶趨之
譏則心和氣舒而祿亦在其中矣某自二月入脩門本
無留中之望延審政堂躡丞外府較之前此之珍則叨
覲過望也立朝最難侃然正色者動為時所忌而平平
無甚高論者人却以不物待之如某輩山野之人安能
改化為此市朝之樣明春纔得一對則便乞一障以還
素心所期只是如此平父袖手觀棋枰豈無一着可以

下教耶天下之寶當為天下惜之更冀講學珍重

答徐公發書

某六十三翁矣每誦邵子六十三吟有云耻把精神虛
作弄肯將才力妄施為此其時也豈其崇情篤雅訪勞
始生賁之錦字之書投以陽春之曲褒拂過甚末章所
謂雷聲半夜起洛波龍則不復有此夢矣嘉定海邦得
賢令尹慈以愷悌鎮以靜謐度其必晏然無事每笑南
冠謂西州人士不諳曉東南獄訟財賦不知孔門稱言

游季路必子賤之賢漢循吏傳述魯恭卓茂虞詡之治亦以才論耶尚勉之哉以張吾軍幸甚偶山行方歸占答草率餘冀以天下之寶為天下珍筵

答鄭子辯書

某厭伏大名於縉紳之林舊矣登朝十年半交天下士獨一面未識荊州華緘惠賜如垂露在手春風拍懷其有德之言形於筆墨遙望之可知也袖雲錦機製花錦地詩書中流出惠政不緩不迫源流自大小鄭公來者

固自與流俗不同也要畧寵貺博學甚多風簷披讀帙
簡而綱宏詞約而事盡用功深者其傳必遠當於此書
見之間者鄉里范潔齋作長編舉要李悅齋作十朝綱
要又有眉山楊明叔者纂成長編紀事流傳世間本末
粗為詳備同先世一書參錯互見後學者何其為幸耶
某舊學荒落新知又不長進今此冒為東嘉之行凜然
未知攸濟蒙賜惠問感荷高情經行使邑自得捧刺以
抒願見之懷歲序匆匆作此不謹願言護笑製精璚縻

徑歸舍香握蘭之選

答涂安禮書

某一自帆落浙江之南望西方美人却如在天上每得朋友書乃以天上人相目何取義之不相侔也向蒙惠教蜀砭三十篇莫非切時之論兩序亦平正無毛病但細觀古人論序所以名世而可傳者不用如此之繁賈誼只是政事一疏諸葛亮只是出師一表王朴只是安邊一策陸宣公已自多了然所言致八利除六失又只

是緣邊事宜一書繳結到得國朝范仲淹論時務十一事蔡襄言國論十二事渡江諸賢或七或八或九或十大抵皆體宣公規模獨林珣者條四十七事各為之目一術紀二師心直至四十六利器四十七明決而後已使其果有切於利害則條分類折不以為瀆如其不然但恐浮文妨要爾不審高明以為何如某常愛文公先生語一學者云公議論中譬如常有一條線子纏縛所以無那精密潔白底意思至哉斯言安禮若有志共學

則常諷誦而深玩味之可也某登朝六載輪對者三上
封事者三每錄副本寄歸常語岳甥轉呈度必澄澈書
月然無一番不與文公門人商量盖文字毛病如春草
漸生旋剗旋有不厭朋友切磋也欲言不盡意切乞講
學珍重

答胡彥肯書

歲序匆匆又熟羊腴矣不審風雨對床近履何似比舍
侄來奉雙壁帖辭豐誼渥仰見耐久之情所諭書傳考

訂六年未脫藁蓋前乎望刑定之聖人而不可見後乎
顧習傳之學者而未有得兀兀於殘蒲朽竹間而欲上
窺姚如殷周周公仲尼之蘊亦已難矣且以其大者言之言
天文者莫精於堯典言地理者莫詳於禹貢言五行者
莫邃於洪範士戴天履地抱負陰陽而上不知經星常
宿之度下不察九州山川之理中不究名位體性氣味
之別則何貴乎為人哉如司馬子長紀班孟堅志則載
書之本文而不釋其義劉更生傳則析洪範之大法而

傳會其義所以義理玄微而窺測難規模宏闊而參訂
難衆說淆亂而折衷難負此三難終未有春融冰釋處
安得有溫柔篤厚之士而與之商畧其蘊哉草草復來
教不宣

答王次點書

某浩別丰神今跨二除矣每懷中川舊游朋友銜杯酒
叙平生談今說古未有如髯翁之豪岸絕羣也舍姪來
蒙緘示周禮訂義四十卷遂足前日春官以下之書畫

憲緒讀手之不置因以是窺見次點真好箇右里經塾
之師蓋自成周教法墮壞田不井授士不自食其食貧
無常產因無常心故秦以客漢以俠晉以清談唐以華
競循至於今馳名薦利者周游四出更無安土踐修之
實遂使三物八刑五禮六樂十二教不復興行於世是
可懼也六官皆經世之典而地官之職尤為該備諸儒
釋之詳矣然意翻空而易奇事證實而難巧祇如司徒
掌教而多載山林陵麓之事掌教象之法何其多目也

屬民讀法讀邦法散見族黨州閭之官不知讀者又何
法也其目可得而聞歟孟子於爵祿之制僅言嘗聞其
畧則想籍去而法亡者不但此一事也次點更為鉤深
纂要以瑩所疑不勝至幸

答潘周卿書

某江心執袂摻別三見薰風矣每懷良友無日不起參
月在門之想便中忽奉瑤帖辭誼亶亶繹繹度越筆墨
畦畛之外手之不置所教書傳大節目工夫浩浩顧何

以窺聖經之藩但此書極難看又難全解缺文當考疑義當考分章斷句當考今文與古文當考小序與大序當考帝王之辭與史氏之辭當考注疏有直見理者有極害義者諸家解有造平易者有傷太巧者當考其如天文地理歲月日時又不可不細考也林少穎解只到洛誥而終呂伯恭解只自洛誥而始朱文公解只有虞書三篇周書三篇今人解書盈箱滿笥此某之所深懼也所以歷年滋久而橐未脫用心益勞而功弗就安得

與諸兄共訂此千古之疑哉某萬里流落居無子雲一區之宅耕無蘓子二頃之田每愛中州佳山水郡乃多士淵藪亦豈不欲希膏溉潤必圖一枝之安比西水達夫叔方及彥隆兄弟各相遺書亦勉其于焉定居今契兄又諄諄及此殆有洛中諸賢延留康節之意感歲亡已秋涼游鴈蕩諸山就為姪輩了婚聘事或有會晤之期更幾為門人自厚

答劉成道書

某遜違誨色三見荻花秋矣每誦月落參橫之句嘗懷
賓友在門之思值便中惠寄瑤帖四詩寵教絕不道煙
火語想游思翰墨圃所造益平澹矣某近來看詩覺得
須是以三百五篇為標本以漢蘓李枚生建安諸子晉
宋陶謝等詩為風骨然後能長一格蓋詞之華者易工
趣之澹者難詣故退之每愛張文昌只稱其學古澹每
喜僧無本但謂其往往造平澹則詞語抑揚之間是猶
未純乎澹也成道若用心科舉外當直以古人自期更

勿從晚唐諸人脚下做起生活此則朋友之望也近作三篇姑錄請教幸賜標月之指會舊游諸丈一轉似之無妨也餘祈以天下之寶自愛

答唐生書

吾行天下半矣獨未能如太史公上會稽登龍門探禹穴雖徧交南州之士獨未識足下比蒙垂訪抵掌談時事動以坡公相期且辱垂示所著史論五首網羅舊聞筆力疊疊不倦未易得也但首篇謂蜀漢之不能成功

者三似若以成敗利鈍言孔明者孔明以區區三分天下之一而經緯十分之九使其不死擒操馘懿必矣看孔明須是看他與昭烈朝夕以興復漢室為已任一片忠誠對越天地即是夏少康以一旅祀夏配天之本心魏人嘗謂其主將畏蜀如虎敵豈可謂無隙之可窺耶向來鄉里南軒先生專為武侯作一傳已發先賢未發之秘想足下未見本否姑答來教餘容面見傾倒

答唐廣夫書

某舊游鶴山知其門有明春秋者於大義數十悉能通
之問焉乃鄉人也豈期道合志同獲聯姻好目其書耳
其論論雖莫得展奉從容大畧過所聞矣聖學失傳道
術分裂一人挽之不若衆人挽之之為易但醇慤者拘
於記誦敏秀者又銜於辭章間有自拔於流俗則遂以
學問驕人外粗慥而不密內顛實而不虛此吾道之所
以孤行而有志於斯者所貴乎求助也姻兄資稟浚明
自處冲退受道之地已寬進進不已實心靠將去何憂

不潰於成若臬輦則依依如游騎出愈遠而亡所歸是則可憐也儻有疑義不妨互相啟發其如世俗之書陽浮相尊非所望耳叔興弟孝友而廉謹器質自良更時與商論大令加切磋玉汝之道亦不能無待親友也

聘饒伯與書

某西州晚學幼讀洙泗聖賢諸書每聞沈潛理學用心科舉外之士未嘗不聳慕傾敬兄弟南來徧求文公之書之徒如葉知道張德元錢子山陳器之皆得與往來

質問而五峯先生則亡弟於漢陽又嘗師之靖惟堂長
徵君講學有本末制行有槩度內明外齊靜專動直於先
老凋落之後惟若原隱君子一人而已某被命出守於
此亦欲以平日所得於聖賢者施之教化而求所以友
事師事者頗難其人俗敝教衰殊未易振起輒欲延屈
長者一臨敝州講論經理不獨使國人有所矜式而某
朝夕得以問政問學亦不至冥行為俗吏之歸也恭敬
之實不可虛拘輒遣車幣薄禮惠肯命駕不勝幸願春

寒尚峭中涂更為吾道自愛

上曹太傅書

竊嘗謂學問之源流未嘗不相接也雖託之於人者或絕或續見之於斯世者有明有晦而義理之在人心微言之詔來世炳炳若揭必將有神會而心得之者曾不以人之存亡世之治亂風俗之升降而為之間斷也春秋之季諸大人不說學夫必多有是說也而後及其大人也則學將落矣然以其時攷之魯之閔子騫則知道


齊之晏子嬰則知禮冀之卻缺則知敬晉之胥臣曰季
則知仁之則周之劉康公則知天地之中穆姜一婦人
耳筮易而知四德曰元善之長也亨嘉之會也利義之和也
貞事之幹也曾不待夫孔子之文言也穆叔一使人耳
誦詩而知五善曰訪問於善為諮諮親為詢諮禮為度
咨事為諏咨難為謀也初不用夫毛鄭之訓詁也意者
當時去聖未遠風氣濡染而聞見正義理浹洽而源流
長其間豈無秀民茂士相與護持苗脉扶堯舜禹湯文

武周公之澤於未墜者哉嗚呼貞元不常會大賢不世
出後之學者受胎不正則血氣偏枯而脉理不相屬矣
下種不實則根苗秕稗而生理不腴暢矣憤悱啟發之
功少則所見皆軀殼之私潛體密察之味不深則所得
不免囿於簡冊之內蓋亦汝源尋流求堯舜禹湯文武
周公所傳者何學孔子子思孟子所學者何事玩辭而
知味因事而推理則蓋有點會於心者矣洙泗之學非
洙泗之學堯舜三代之學也河洛之學非河洛之學孔

子子思孟子之學也蓋自濂溪周氏伊川二程氏上接
洙泗之傳下演河洛之學繇北方而盛行於南國者蓋
亦有自來矣南軒受道於五峯於是乎有湖南之學呂
公受經於三山於是乎有東萊之學象山兄弟自立於
家塾又於是乎有江西之學惟永嘉陳氏之學則得於
薛公持正建安朱氏之學接於周公行已許公景衡而
實本伊川者也太傅崛起南方學問有源委行已有槩
度甫年二十從止齋游則讀書講學已就事上窮究實

體其後與晦翁往復問答剖析疑義則又欲從理上推
致於事事物物之間其實元一法也惟其源委之正也
故其為文也如水行地能普萬物之澤為道也如星麗
天能回萬古之光蜀中何幸而乃得執事昌明正學以
為斯文宗主哉佔畢小儒濫叨蜀學平時非不知誦其
書服其言有志於古儒先之學然粗得一知而不繇其
統僅沾一溉而不窮其源燥乾枯涸之病多潤澤字戶
之功少有如太傅者則某所願見而欲觀其的傳者也

昔侯氏師聖初從伊川未悟後訪濂溪越三日而有得
如見天之廣大世蓋有終年不能究其學而一夕之間
氷釋理悟者執事幸教焉不宣



--	--	--	--	--	--	--	--

欽定四庫全書

集部

鶴林集卷三十三
四

詳校官庶吉士臣瑚圖禮

主事臣呂雲棟覆勘

膳錄監生臣吳殿英

欽定四庫全書

鶴林集卷三十三

宋 吳泳 撰

策問

召試館職策問

洪惟國朝以武戡亂以文致平以王道御軍以儒術理
國士馬不如漢之強鹽鐵不如唐之富勲臣貴將不如
雲臺凌煙九侯八葉之盛而國勢隱然如泰山磐石之固
者要必有道也論相人主之職我祖宗時齋居正慮先

志後占或以德選或以才用或以器量學術取或從訟
邊帥臣及曾歷三司諸路轉運使而擇故命下之日士
慶于朝農歌于野夷人相戒不敢生事于邊其勲業光
明磊落如此近世以來何相才之難得也若以資論則
築巖釣渭之叟徑登上相何必有揚歷耶若以望言則
削書操筆之吏遂冠列侯又豈必皆德望耶諉曰黜陟
拜罷由於獨斷則罷者既免召者未至揆席其可久虛
耶命將帥天子之事乾淳盛時或召對玉陛臨遣或親

酌卮酒寵行每邊帥缺則於近地監司郡守選差制置使闕則於諸路安撫使內推擇故有自姑孰而鎮金陵者有自靜江而開襄閩者有自長沙而移荊州者有自山陽而留帥維揚者有自興沔梓遂而備除益帥者將帥之才隨取隨足如此比日以來何臨事而乏使也若取之出入邊關經歷事任則捨耒投筆之夫豈不能將上軍護絕塞耶若選之親履行陣躬冒矢石則雅歌緩帶之士豈不能征強兵挫堅敵耶若謂薦舉選用必須

實才則誇者似勇誕者似忠帥才又何能得實耶國初
養兵僅有十二萬太祖南征北伐乃有百萬之用孝宗
中興雖曾至四十餘萬然一年揀軍兵二年揀效用三
年揀使臣甚至欲省江池一軍以寬民力初不患兵少
也今內而三衙外而江上遠而蜀口連營列竈數夥於
昔而又創遊擊增忠義招刺北人請益兵不已曾未聞
得一級斬一馘以獻其病安在國初賦入僅一千六百
餘萬而征行調度未嘗有乏興之憂淳熙歲計較之先

朝雖多然罷獻羨却寬剩不科降度牒而封樁之積至
于貫朽建康京口江上諸處寄樁率數百萬未聞其財
乏也今版曹所入朝廷所儲四總領所分撥窠名色額
不減於舊而增印諸料更易鈔法科數仕牒僧符議生
財不已曾未見上用足而下不匱厥敝何繇夫相國之
良醫也帥民之司命也兵社稷之衛而財人之心也必
欲開誠布公經事綜物鎮拊夷夏統一宮府則任相之
道何以集思廣益綏遠折衝保安三邊調御諸將則儲

帥之方何先淮之兵分而趨成新邊蜀之兵斂而退屯
內郡或分或合欲使部分歸一攘却勁敵則理兵之務
何急甲言戰則棄資糧如丘山乙言和則捐金帛如糞
土或斂或散欲使用度均節實利國家則裕財之策何
上昔人有言欲濟世務譬猶同舟涉海一事不牢俱受
其敗今天下所同憂者非但一事而已而四事為尤大
子大夫以俊傑自命豈無高識宏論裨補于時况給劄
玉堂非弄翰科場比也其悉陳之以備上來擇

經筵翰苑策問

問經學帝王之軌範文章政化之黼黻有天下以來扶持三綱緝熙五紀與天地相為經緯而不容一日闕者其所關係者大也我宋受命五星聚奎首開人文尊尚儒學故橫經列侍與天子朝夕講論則有經筵分院更直代王言以數告四方則有翰苑選任亦不輕矣其班秩則侍讀次學士下其祿賜則經筵與翰林等其進見則數對便殿為天子親密之人其勅設燕會則盡出特

恩雖執政大臣有所不與故先儒每以陪侍經幄得近天威為榮而顧瞻玉堂如在天上為嘆者厥有由也漢唐不足進矣獨考國史與諸君評之舊典侍從以上則為講讀秩卑資淺則為說書然祖宗時蓋有以著郎為侍讀侍御為說書者豈官秩之崇卑有時而不問耶故事宰相拜罷則翰林院降制餘官遷謫則舍人院草詞然祖宗時蓋有罷一樞密而不宣制麻出一副使而特降手詔豈恩數輕重有時而不同耶謂勸講多領別官則

免修國子監條制何謂懇辭之嚴謂詔書當不出位則訪以時政得失何謂召見之數嗚呼是猶以職事言也天下治亂在宰相君德成就責經筵則所以涵養氣質薰陶德性寧非講官責耶講治不講亂讀存不讀亡恐非勸戒之義知言治而不知正君知正過而不知養德恐非輔道之實伊川醇儒也而自度乏溫潤之氣溫公洽聞也而猶恐失記憶之詳呂正獻公語約而義明可以為當世之冠而講及論語亂臣十人同職者猶有子

無臣母之義豈講官果難其人耶抑進止密勿之間有不容以疾辭遽色感動之耶宰相之重容可雜以他官處之惟翰林學士非文章不可然則宣示上意感發人心非文字之職耶草除宰相麻而事或廢亡草答高麗詔而語多不工楊公億淹博如此而鄰壤交懼之書不免以字嫌陳公襄直諒如此而水不潤下之詔不免於理誤范蜀公鎮世掌絲綸者也宜其所長在文字之間而批答不稱旨至欲諭之使去豈文字果難其職耶抑

詔書旁午之際有不經思慮者耶或曰講解未盡許令
退歸討論命詞舛誤亦容論奏貼正可乎不可也或又
以為涉獵書史不可該以學問駢四儷六不可謂之文
章當乎不當也隱逸而起為說書者凡幾人不試而命
知制誥者凡幾士講讀之所有過英有延和有崇政殿
在古為何如詞翰之官有閣老有翰長又有員外學士
在今為何官坐講立講之制何以分名對奏對之名何
以異要必有成說訂正於此方今經筵勸講既不專官

學士草制率多寓直意者為官搜擇以天下真儒碩才之選豈無能以道學輔人主文章施朝廷畢書生之志願者乎其茂明之母忽

聖學時政策問

乙酉成
都漕試

問道不本諸三王則無善治學不根諸六藝則無成法自昔人主出而為億兆之君師豈其無英明才智可以度越於人然而功利之說常勝道德之意常薄昏闇之日常多清明之時常少何也古治寢遠而風氣澆聖文

燕滅而師承異上莫得明大道之指要下莫得遵至治之成法漢唐之治所以不能堯舜三代是則有繇矣抑不知未有六經以前堯舜禹湯文武汲汲其所學者何事耶聖宋受命五星聚奎文明之化焜耀史冊方皇業初基日不暇給而我藝祖皇帝於即位之月首以幸學為事其造端立本之地蓋已異於前代矣歷聖相承嗣守家法羣儒環列宏闡大猷於改元之初而命臣頤正講書內苑此咸平之制也於禋祭之後而命臣奭等講

經便殿此乾興之典也於祔廟甫畢之日而親御通英
召侍臣講讀此又嘉祐治平故事也祖宗盛際無一時
非典學之時無一日非親儒之日深宮燕處不廢觀書
隆暑祈寒未嘗輟講向使親儒務學之意不為崇觀羣
邪所撓亂則可以回崇觀為元祐居喪罷講之議非紹
興諸君子抗疏爭之則何得有南渡中興之功學之有
益乎天下國家蓋如此其懿也皇上嗣服龍德進升儲
神古訓既懋緝熙之功增置說書又多聚辯之益翕受

以蓄其德敷施以達於事舉而措之天下豈不光明盛大矣哉然猶有可言者皇極之建所以消朋比也職守求以相凌議論求以相勝則安得有同寅協恭之風學校之設所以䟽化原也侮慢以為常佻達以為俗則安得有親師視學之意生財以大道而州里凋敝廩司單乏旋以為計財亦未易生也立武以常德而田不營屯士不素練苟日無事武亦未易立也况世讎之敵新興之元常伺隙於其外而吾三邊將吏被介冑不得卧塞上

居民聞角弓之聲則拊心而驚問學之強如此治效之遲乃如彼豈先致其知而未見於行歟抑作新於上者已至而四方猶未丕應歟修齊治平之道固有遠模闢闡轉移之機端在初服今欲以學問銷朋黨以儒術美教化修飾孝弟以強軍旅興行禮義以足財用武臣使之知書弓冶之子使之為士以凝庶績以恢中興將何道而濟登于茲也書曰王人求多聞時惟建事諸君母謂皇帝之學與經生學士不同其悉言之無隱

江淮兵策問

問天地溫厚之氣始於東北而盛於東南天地嚴凝之氣始於西南而盛於西北一氣周流於天地間固未嘗界南北而限之也而鍾溫厚之多者則為陽為文明為寬柔以教不報無道而得嚴凝之多者則為陰為肅殺為社金草死而不厭自昔論衣冠禮樂必歸之東南而選將募兵必取之西北者蓋以是也然考之三代則有所不然且以兵言之兵乘之制無一國而非兵牙璋所

起無一方而不調漢晉以來猶兼四方之兵不偏廢也
高祖嘗用閩粵兵矣孝景嘗用東甌兵矣武帝嘗用會
稽兵矣光武嘗用江夏兵矣昭武嘗用武陵兵矣劉表
嘗用荊州兵矣諸葛恪嘗用丹陽兵矣而未聞取之西
北也周瑜以江上之師破老瞞於赤壁謝玄以淮壖之
衆蕩狂士於淝水虞潭以東方兵共平僭叛劉牢之以
北府兵屢挫強敵其如臨瀕上入長安又皆吾水軍步
騎也則亦未嘗募之西北也惟我國朝南渡之初扈從

六飛者率多元帥府之兵而屯於江上者又皆夙將麾下帶行之士如王彥一軍則河北土人也如吳玠一軍則關西部曲也韓曰背嵬軍張曰鐵山軍劉曰赤心騎兵二軍皆山東陝西河北諸處精銳其軍中所謂克敵弓所謂駐隊矢所謂銳首小槍則又萃集四方良工而製焉者也而獨不用東南之一旅何也夫都於江南而用江南之人可也漢都關中洛陽而下取吳粵之士本朝駐蹕吳會而用關西河北山東之人此又何耶或曰北

人之長技以鞍馬素閑而便於馳突吾之馬弗如也風俗勁悍而勇於格鬪吾之卒弗及也果如是說則飲江之騎掠塞之兵可以驅駕全吳矣高宗皇帝慨然發憤每謂取勝不必北方士馬而它日順昌之戰敵之諸酋乃謂南朝之兵非昔之比則彼自畏吾南兵也而昔所謂自陝西山東河北來者反不足畏歟今天下非少兵也上而巴蜀中而荆襄下而淮南連營相屬也而使敵窺淮南則將上流之衆便可分荆鄂而東敵犯蜀關則率

中權之師便可依均房而北此首尾俱至之勢而今一方有變自應不給所恃以稱雄於天下者獨江東淮西兩軍爾第一二年來閩中盜起則調某軍江西寇作則調某軍逆全稱叛則調某軍三衢竊發則又調某軍近者襄陽告急則亦欲調某軍豈天下勁兵處更無可調而僅有游奕武定寧淮強勇雄關飛虎數州之人耶幸而蜀道漸夷襄州奏功不煩援師之行若其未也提軍遠征脫有缺折則又將從何所調遣耶昔人謂每一發兵

髮為之白言其不可不謹重也諸君俱自學古試為我
溯源尋流窮天運之始觀風氣之宜覽漢晉三國之地
勢稽國朝諸大將之戰功究今日襄蜀江淮之兵力叅
之於古而可信用之於今而可行詳著於篇毋謂經生學
士不知兵畧

四京守禦策問

甲午太
學解試

問光武披輿地圖以示鄧禹而禹以為其興在德藝祖
皇帝出幽燕圖以示趙普而普以為其難在守蓋規模

宏遠者帝王高世之畧而議論深密者英雄超物之見
二者可以相成而不可以偏廢也且以圖籍所識與諸
君商之南曰應天凡陳潁諸郡皆應天控馭之也東曰
開封凡曹滑等州皆開封臨制之也西曰河南北曰大
名凡自洛以西河以北皆洛陽大名襟帶聯絡之也國
朝建都於汴維以三京實輔車相依之勢不幸而數逢
陽九王室不競遂以四京形勝落于穹廬者百有餘年
皇上出聖入神中原在夢越我友邦冢君暨于驅虎熊

羅之士亦莫不欲殄殲乃讎以光復境土乃六月丙子復宋城丙申收汴都又一月甲子徑取洛陽天威所臨如疾風掃殘葉雖漢澄三河唐復兩京殆不過此則是京邑之四今已有其三矣然而陳留當天下衝四通五達無山溪之險無藩籬之限所恃者特以兵為守太祖時已慮兵冗至謂不出百年民力殫矣則今得東京將以何道理之耶睢陽城不高池不深封域不廣且無山川之饒以實守備當中興時廷臣建議每慮金人或以

數千騎猖獗而南其於國家不能無警則今有南京將以何策禦之耶或曰西洛帝王之宅裏山表河左伊右瀍大谷通其前盟津達其後上可以聯屬關陝下可以援接東京形制之勢強于開封應天矣然晉嘗表鎮西將軍鎮洛留河南太守戍洛又嘗詔遣散騎長侍修復五陵而終不能長有中原之土何也或曰河北天下根本定為右臂瀋為左臂瀛為腹心京為頭角得魏則河南山東重失魏則河南山東輕是東西京非得河北又不

能以自固也然裕嘗命冠軍將軍渡河遣北直隊主上
北岸以左將軍為北青州刺史而終不能爭守河北之
地又何也豈兼併易能而堅凝之道為難歟豈寇難既
平而時會之來不接與今露布星馳我疆日闢揆之理
勢似難中止若進而遠攻耶則資用單敝恐鞭長有不
及馬腹之憂若退而歛戍耶則豪傑生心恐漁者因以
得蚌鷸之利若畫河而自守耶則天寒地凈安能保敵
騎之不來若爭關以據要害耶則塞險斷路彼豈能無

謀臣之深計若分為三大屯使之與民雜耕則敵兵踐蹂終無可耕之丁若析為三大鎮使之有兵自調有財自足耶則江上風寒寧無他盜之慮新復州軍華戎雜處或未能擾習于教條麾下將士參以南北或未能洞照于肝膽守孰重孰輕攻孰緩孰急經理處置之宜孰得孰失四京之名起于何代四鉅鎮之策建于何人此皆所當講明者若魏元忠以禦吐蕃之策獻于唐曰今言文者以辭華為首而不及經綸言武者以騎射為先

而不知方畧旨哉言乎其有益於人之國也如此元忠自太學出也諸生幅巾奮袖談詞如雪豈欠一元忠哉願書其對有司將以復於上

蜀師與夏人夾攻金人策問

問自昔中興創業之君其所以圖維天下非有素養之兵夙任之將舊撫之民而為之用也裒荆之旅高宗所以興有商微盧彭濮之人武王所以撫中夏雖以成周太平之盛兵滿天下而衛九畿者乃取於蕃夷之籍搏

羣盜守內列者乃進於蠻貊之隸何昔之聖人虛懷大
受直不以異域之人而疑之可諉曰我有以制之而不
專倚之共功也漢氏之興則援四夷之兵為中國之用
矣籍之未平則用閩粵兵漚之未戡則用東甌兵或許
致貉北泉騎以助漢或請將湟中義從以討羗或假胡
兵數千分道以擊先零或率南單于之衆并力以破鮮
卑黃支之南大夏之西控弦之騎四方之人率為漢用
而期門羽林材官騎士三輔十二城之屯殆擁虛器矣

豈料遠敵乎大難不取於常勝之師耶抑貴仁慕義者
喜身為犄角之助耶猶曰未即與之共約也上書侃府
共議北伐燕於是乎有請封之約矣表乞亮等齊力江
沔涼於是乎有請戰之約矣若能共討者可遣軍來魏
於是乎有乞師之約矣遙指河北自常山以東屬宋常
山以西屬夏赫連與劉宋又於是乎有分地之約矣約
既成則應之也宜不緩而今也天臺之議不行臨江之
告不答敵境往來之使竟為邏者所獲而連鷄不能俱

飛之語不出於謀臣之料或謂晉宋君臣屢失大機者
以此其然乎其不然乎我國家有兵自養有將自御有
金穀自制聖祖神宗之懿識先正老成之長慮未嘗不
深思而熟計之也然涇原熟戶曹武惠曾用之以制蕃
族環慶族類范文正曾用之以拓邊界而航海夾攻之
盟不能止亂而反有以養亂抑何歟今夏人欲定夾攻
之議而我師亦起而應之應之誠不得已也兵應之後
將長驅席卷而前邪將畫地分疆而守邪得之則四塞

之地備多而力分不得則退師之後招輕而納侮或謂
進守可以固吾圉羈縻可以得敵心然逖彼夏土大邦
為讎萬一窺我之無備而反戈以相攻將何以待之耶
今出師未幾計所告匱其或兵連禍結不可卒解生券
之糧犒勞之錢遠戍之衣裝器械又於何而取之耶諸
生在泮久矣願言周漢所以用屬國之道晉宋所以結
異域之策與夫國家之所以待蕃族待敵人之異有益
於時無負所學者願條陳之毋畧

州兵土丁策問

問晉以撤州郡之備而單虛唐以籍雄邊之丁而強實
凡矯世救敝譬猶行舟於川豈可橫截迅流而不思所
以平濟之道哉世之望空談兵者類曰羽林天仗之屯
如擁虛器也棘門霸上之軍如養驕子也伍符為具文
尺籍為烏有也而兵之所以受敝之處則實未嘗深知
也國家盛時詔諸道兵為長吏之所役著為令廂禁軍
敢占為工技者論如法銷患未形之意遠矣嘉祐以來

又有教閱土丁格治平元豐間又有團結土丁條搜揀
益精而武備嚴激擣加厚而兵計密異時西邊用兵羗
人每出聞多土人則輒相戒不敢輕犯兵之足以立國
其功效章明乃如此哉今日兵法之敝莫敝於內郡之
兵邊卒之驕莫驕於雄邊之丁三陟晏清雖無風寒不
備之虞而一面受病若有蜂蠆含毒之慮脫或蔡蒙之
下獅子一逸而蹈吾中州之境則將以何道隄禦之欲
倚官軍為用歟則羸卒執器仗無異編民代直但曰占

數春秋都試既不能使之閱習恐動之言妄至則望寇
先潰不待接風塵交旗鼓也將以土丁為用耶則散處
村堡卒未可以招集各持鋤耰非復有於節制平日恩
信又無以素結其心重譯者因以利誘之則環寇不戰
不但入其巢穴為之嚮道也或曰用土丁不如用州兵
然一禁軍之廩給足以贍土丁三人而三禁兵之材力
不足當土丁一人蘓黃門嘗有是說矣禁軍之不足倚
仗乃如此或曰募官軍不如募土著然部伍上下不如

官軍之整肅土豪姦傑必待官軍之牽制富鄭公嘗有是論矣土兵之不可專用又如此無已則從兩相制禦之說然隸尺籍者薄田夫身白徒者忌禁旅又安得使之豫附而入吾駕馭籠絡之內哉伊欲嚴按閱程技擊如乾德天聖之令可得而行之乎厚撫其豪長畧汰其獐耄如治平元豐之格可得而用之乎徹桑土者當於未雨今疆陲多事之時而方議簡兵之制不幾於後時乎指畫山川之圖口占屯兵之數諸君豈無識時務者

幸條陳其事如曰我甲在心彼甲在外則非有司之所
欲聞也

欽定四庫全書

四

卷三十三

三